

ՋԵԿՈՒՑԱԳԻՐ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐՄԱՎԻՐԻ ՄԱՐԶԻ
ՄՈՒՍԱԼԵՌԻ ՀԱՄԱՅՆՔԻ ՂԵԿԱՎԱՐԻ 2018 ԹՎԱԿԱՆԻ
ԳՈՐԾՈՒՆԵՈՒԹՅԱՆ ՎԵՐԱԲԵՐՅԱԼ

Մուսալեռի համայնքապետարանը իր աշխատանքային գործունեությունը կազմակերպել է ղեկավարվելով «Տեղական ինքնակառավարման մասին» ՀՀ օրենքի պահանջներով: Ըստ բնագավառների իրականացվել են հետևյալ աշխատանքները.

Քաղաքացիների իրավունքների պաշտպանության բնագավառում

Կատարել է քաղաքացիների ընդունելություն, օրենքով սահմանված կարգով քննության է առել քաղաքացիների առաջարկությունները, դիմումները և բողոքները և ձեռնարկել է համապատասխան միջոցներ:

Միջոցներ է ձեռնարկել պաշտպանելու համայնքի բնակիչների ու տնտեսվարող սուբյեկտների իրավունքներն ու օրինական շահերը:

Հրավիրել և վարել է Մուսալեռ համայնքի ավագանու 15 նիստ: Արձակել է 30 կարգադրություն, ընդունել 58 որոշում: Տրվել է 1067 տեղեկանք: Ելից գրությունների թիվը՝ 390, մտից գրությունների թիվը՝ 463:

Ֆինանսների բնագավառում

Օրենքով սահմանված կարգով կազմակերպել է գույքահարկի՝ շինությունների 3 347 675 դրամ /տարեկան պլանային ցուցանիշը՝ 3 797 700 դրամ/, փոխադրամիջոցների 8 927 763 դրամ /տարեկան պլանային ցուցանիշը՝ 8 260 600 դրամ/, հողի հարկի 5 266 100 դրամ /տարեկան պլանային ցուցանիշը՝ 6 811 800 դրամ/, տեղական տուրքերի՝ 629 700 դրամ /տարեկան պլանային ցուցանիշը՝ 594 300 դրամ/, վարձակալական հողերի վճարների՝ 136 700 դրամ /տարեկան պլանային ցուցանիշը՝ 262 400 դրամ/, այլ

եկամուսներին՝ 4 025 000 դրամ, /տարեկան պլանային ցուցանիշը՝ 5 400 000 դրամ/ գանձումը:

Մուսալեռ համայնքի բնակիչ հանդիսացող թվով 117 անձանց տրվել է դրամական օժանդակություն՝ 4 690 000 դրամ: Համայնքի ղեկավարի որոշումով դրամական օգնություն է տրվել 31 նորածին երեխաների ընտանիքների՝ 30 000-ական դրամ, հարազատին կորցրած 17 ընտանիքների՝ 50 000-ական դրամ, պարտադիր զինվորական ծառայությունից զորացրված 8 երիտասարդների՝ 20 000-ական դրամ: Համայնքի ավագանու որոշմամբ սոցիալապես անապահով և բուժման կարիք ունեցող 61 անձանց տրվել է ֆինանսական օգնություն՝ ընդհանուր 2 750 000 դրամի չափով: Համայնքապետարանի կողմից օժանդակություն է ցուցաբերվել 2018 թվականի ընթացքում կարկտահարությունից տուժած 38 անձանց՝ ընդամենը 1 365 500 դրամի չափով:

Համայնքապետարանը աշխատավարձի գծով պարտքեր չունի:

Պաշտպանության բնագավառում

Լրացվում է Մուսալեռ համայնքի զինապարտ քաղաքացիների հաշվառման գրանցամատյանը:

2018 թվականի ընթացքում զորացրվել է թվով 8 զինվոր: Զորացրվածներին տրամադրվել է դրամական պարգև՝ յուրաքանչյուրին 20 000 դրամ:

Հոգացել է «Էջմիածնի ավտոդպրոց» ՍՊԸ-ում սովորող 2 զորակոչիկների երթևեկության ծախսերը:

Քաղաքաշինության և հողօգտագործման բնագավառում

Անմիջական վերահսկողություն է իրականացվել համայնքի հողային ֆոնդի նպատակային օգտագործման համար:

Իրականացվել է համայնքային սեփականություն հանդիսացող 0,0706 հա մակերեսով գյուղատնտեսական նշանակության հողատեսքի աճուրդ-վաճառք:

Սահմանված կարգով տրվել է համայնքի վարչական սահմաններում իրականացվող թվով 6 բնակելի տան և համայնքի միջնակարգ դպրոցի վերակառուցման շինարարության թույլտվություն:

Կազմվել է հողային հաշվեկշիռ:

Կոմունալ տնտեսության և բարեկարգման բնագավառում

1. Համայնքի Ս. Անդրեասյան փողոցում կատարվել են հողային հարթեցման և ավազակոպիճով շերտի պատրաստման, Սայաթ-Նովա, Վ. Մամիկոնյան փողոցներում՝ խճավազով հարդարման, Մ. Սարգսյան և Կոմիտաս փողոցներում՝ ընթացիկ վերանորոգման և հարդարման աշխատանքներ:
2. Վերանորոգվել է համայնքի գյուղատնտեսական հողատարածքների հատվածում դաշտամիջյան ճանապարհները կապող կամրջակը, Զ. Անդրանիկ և Պ. Սևակ փողոցներով անցնող սելավատարի վրայի կամրջակը:
3. Վերանորոգվել է համայնքի գերեզմանատան հանգստի քարը:
4. Կատարվել են Անի թաղամասի կոյուղագծերի, դիտահորի մաքրման աշխատանքներ:
5. Դվին թաղամասում, Վ. Մամիկոնյան, Սայաթ-Նովա և Գինեվետ փողոցներում անցկացվել է գիշերային լուսավորության համակարգ:
6. Համայնքի «Մովսես Տեր-Գալուստյանի անվան մանկապարտեզ» ՀՈԱԿ-ի շենքի վերանորոգման նպատակով կատարվել են նախագծահետազոտական աշխատանքներ, ինչից հետո շենքը կապիտալ վերանորոգման է ենթարկվել: Հետագայում շենքի կապիտալ վերանորոգման չենթարկված հատվածներում կատարվել են ընթացիկ վերանորոգման աշխատանքներ:
7. Ընթացիկ վերանորոգման աշխատանքներ են իրականացվել համայնքի հանդիսությունների սրահում:
8. Ընթացիկ վերանորոգման աշխատանքներ են տարվել համայնքի Ֆր. Վերֆել, Կոմիտաս, Մ. Սարգսյան, Լուի Դարթիժ դյու Ֆուրնե, Զ. Անդրանիկ, Մ. Բաղրամյան, Պ. Սևակ, Արգիշտի, Ս. Անդրեասյան, Մ. Մաշտոց, Գ. Նժդեհ, Չարենց, Շառլ-Տիրան Թեքեյան փողոցների և Անի թաղամասի գիշերային լուսավորության համակարգերը:
9. Համայնքի բարձրադիր փողոցների բնակիչների համար խմելու ջրի խնդրին կարգավորում տալու համար անցկացվել է ջրագիծ, իսկ առկա ջրագծերի անխափան

աշխատանքն ապահովելու համար կատարվել են ջրագծերի, ինչպես նաև ջրամղիչ պոմպի վերանորոգում,

10. Համայնքապետարանի կողմից օժանդակություն է ցուցաբերվել Շառլ-Տիրան Թեքեյան փողոցում կանգառի տեղադրման աշխատանքներին,

11. Համայնքի գրոսայգին բարեկարգվել է, տեղադրվել է ցայտաղբյուր,

12. «Մաքուր Հայաստան» համապետական ծրագրի շրջանակներում Մուսալեռ համայնքում պարբերաբար անցկացվել են շաբաթօրյակներ, կատարվել են գետնանցման մաքրման աշխատանքներ:

Համայնքի ղեկավարի գործունեությունը առևտրի և սպասարկման բնագավառում

Համայնքի ղեկավարի կողմից տրվել է ոգելից խմիչքների, ծխախոտի, վառելիքաքսայուղային նյութերի վաճառքի թույլտվություններ:

Հանրային, կենցաղային ծառայությունների ոլորտում հսկողություն է իրականացվել:

Առողջապահության, ֆիզիկական կուլտուրայի և սպորտի բնագավառում

Նպաստում է համայնքում ֆիզիկական կուլտուրայի և սպորտի զարգացմանը: Պարբերաբար տարվում են ֆուտբոլի խաղահրապարակի մաքրման, բարեկարգման և պահպանման աշխատանքներ: Ոլորտի զարգացմանն է միտված 2018 թվականի ընթացքում ֆուտբոլային մարզագույքի ձեռքբերումը:

Կրթության, մշակույթի և երիտասարդության հետք տարվող

աշխատանքների բնագավառում

Մայրության և գեղեցկության տոնի առթիվ զինվորների մայրերին, Ֆրանց Վերֆելի անվան դպրոցի, համայնքի մանկապարտեզի, փոստային բաժանմունքի, բուժամբուլատորիայի, համայնքապետարանի կին աշխատակիցներին տրվել են նվերներ: Զինվորների մայրերին տրամադրվել է նաև ֆինանսական օժանդակություն:

2018 թվականի Ֆր. Վերֆելի անվան միջնակարգ դպրոցի շրջանավարտների ավարտական երեկոյի կազմակերպմանն աջակցելու նպատակով տրամադրվել է 100 000 դրամ:

Երեխաների պաշտպանության միջազգային օրվա կապակցությամբ համայնքի մանկապարտեզում կազմակերպված միջոցառման շրջանակներում երեխաներին նվերներ են բաժանվել:

Մանկապարտեզում պարբերաբար կատարվում է դեռատիզացման, դիզինֆեկցման աշխատանքներ:

Գյուղատնտեսության և բնապահպանության բնագավառում

Նպաստել է ինքնակամ հողագավթման կանխմանը: Համայնքում կատարվել են կանաչապատման, աղբի մաքրման և տեղափոխման աշխատանքներ:

Գյուղատնտեսական աշխատանքների ընթացքի կարգավորման համար վերանորոգվել է համայնքի տրակտորը:

Առկա հիմնախնդիրները

1. Համայնքի մի շարք փողոցներ ունեն կապիտալ նորոգման, ասֆալտապատման կարիք:
2. Համայնքի Լուի Դարթիժ ոյու Ֆուրնեի փողոցը, որը կից է Երևան-Էջմիածին մայրուղուն, ամբողջությամբ ապահովված չէ գիշերային լուսավորությամբ:
3. Համայնքի որոշ փողոցներ զուրկ են գիշերային լուսավորությունից, որոշ փողոցներում էլ ապահովված չէ գազաֆիկացումը:
4. Համայնքի գերակա խնդիրներից մեկը Խ. Աբովյան բազմաբնակարան շենքի վթարային վիճակն է:
5. Համայնքը զուրկ է մշակութային օջախներից, ինչը հանգեցնում է երիտասարդությանը նշված ոլորտից հեռանալուն և դրանից բխող կրթական, դաստիարակչական խնդիրների առաջացմանը:

6. Գյուղում առկա միջհամայնքային ճանապարհը զուրկ է երթևեկության նշաններից, անվտանգ երթևեկություն ապահովելու համար անհրաժեշտ է դրանց տեղադրումը:
7. Առկա գյուղտեխնիկայի ցածր օգտավետության պատճառով գյուղատնտեսությամբ զբաղվելը սակավ արդյունավետ է:

Մուսալեռ համայնքի ղեկավար
05.02.2019թ.



Է. Հովհաննիսյան

ԱՐՁԱՆԱԳՐՈՒԹՅՈՒՆ N 1

Հայաստանի Հանրապետության Արմավիրի մարզի Մուսալեռ համայնքի
ղեկավարի հաշվետու ժողովի

2019 թվականի փետրվարի 5-ին՝ ժամը 14.00-ին, Հայաստանի Հանրապետության Արմավիրի մարզի Մուսալեռի համայնքապետարանում տեղի ունեցավ համայնքի ղեկավարի հաշվետու ժողով:

Ժողովին ներկա էին համայնքի ավագանու անդամներ, համայնքապետարանի, մանկապարտեզի աշխատակիցներ և համայնքի բնակիչներ:

Համայնքի բնակիչները իրենց գոհունակությունը հայտնեցին համայնքում կատարված փողոցների ճանապարհների ընթացիկ վերանորոգման աշխատանքների վերաբերյալ: Սակայն նշեցին նաև, որ մասնակի բարեկարգումը ամբողջովին չի լուծում խնդիրը՝ շատ փողոցներ դեռ կարիք ունեն մեծածավալ կապիտալ նորոգման աշխատանքների:

Քանի որ գյուղի տրակտորը գյուղատնտեսական աշխատանքների եռուն շրջանում երբեմն չի բավարարում աշխատանքների իրականացման համար, բնակիչները առաջարկեցին նոր գյուղտեխնիկա ձեռք բերել: Ամռան ամիսներին գյուղում սրվում է հատկապես խմելու ջրի խնդիրը:

Իս. Աբովյան շենքի բնակիչների անհանգստության պատճառներից մեկն էլ նշված բազմաբնակարան շենքի վթարային լինելու, հետագայում վտանգ ներկայացնելու հարցն էր: Վերջիններս խնդրեցին լուծման տարբերակներ գտնել՝ շենքի ամրացման կամ որևէ այլ տարբերակով:

Համայնքի ղեկավարը ներկայացրեց 2018 թվականի ընթացքում կատարված աշխատանքները, խոսեց հետագա ծրագրերի մասին, պատասխանեց ներկաներին հուզող հարցերին:

Նա հայտնեց, որ համայնքապետարանի համար նույնպես առաջնահերթ են համարվում այնպիսի աշխատանքների իրագործումը, ինչպիսիք են խմելու ջրագծերի անցկացումը, փողոցների և ճանապարհների բարեկարգումը, համայնքի բնակիչներին անհրաժեշտ կոմունալ-կենցաղային պայմանների բարելավումը: Համայնքի ղեկավարն իր

խոսքում հայտնեց, որ 2019 թվականի համար ևս համայնքապետարանի առջև կան հստակ դրված նպատակներ, որոնց իրագործմանը պետք է հասնել տարվա միասնական ջանքերով: Նպատակներից որոշներն էլ անմիջականորեն առնչվում են բնակիչների բարձրացրած հարցերին: Ուստի համատեղ ջանքերի շնորհիվ համայնքում կշարունակվեն իրականացվել համայնքում բնակիչների կենսական կարիքների բավարարման և մի շարք այլ հարցերի լուծմանը միտված աշխատանքներ:

Աշխատակազմի քարտուղար

Գ. Սալադյան

